

## Bataaki Pool yaade to Romankooþe

<sup>1</sup> Bataaki ki to am yuuri, miin Pool. Mi maccudo Iisaa Almasiihu, mi noddado faa mi laatoo nulaado muudum. Wo mi cubaado faa mi yottina Kabaaru Laamdo Lobbo. <sup>2</sup> Kabaaru Lobbo oon wo mo Laamdo aadino gilla e annabaabe muudum ley Binndi ceniidi diin. <sup>3</sup> Kabaaru oon wo haala Biyiko haalata. Fodde neddaaku muudum wo yuurudo e Daawda. <sup>4</sup> Fodde Ruuhu ceniido du, holliraama wo Bii Laamdo jom baawde ko ummitii e maayde duum. Oon woni Joomiraado meeden Iisaa Almasiihu. <sup>5</sup> Saabe makko min kebiri moyyere laataade nulaabe faa yimþe yuurube e lenyi fuu ngoondina mo, dowtanoo mo, de innde makko teddinee. <sup>6</sup> Onon du, odon njeyaa e maþþe, onon 6e Laamdo noddi faa kawton e Iisaa Almasiihu been. <sup>7</sup> Mido jowta on fuu, onon wonþe ley Roma 6e Laamdo horsini de noddi faa laatoo seniibe. Wo Laamdo Baaba meeden e Joomiraado men Iisaa Almasiihu kokku on moyyere e jam.

*No Pool yidiri yi'ude goondinþe wonþe Roma  
been*

<sup>8</sup> Ko artii fuu, mido yetta Laamdo e dow innde Iisaa Almasiihu saabe moodon on fuu, sabo haala goondinal moodon ina haalee ley adunaaru fuu. <sup>9</sup> Laamdo mo ndewammi e bernde am fuu e ko ngollanammi Kabaaru Lobbo haala Biyum duum, wo seedee mido miccoo on wakkati fuu <sup>10</sup> e ley

du'aawuuji am fuu. Mido ɳaaroo Laamdo new-nana kam laawol e ley muuyde muudum no mi warda to moodon. <sup>11</sup> Sabo mido yidi yi'ude on sanne, faa mi yottinana on dokkal yuurungal e Ruuhu faa semmbindina on. <sup>12</sup> Woodi, ko njidumi wi'ude wo faa cemmbunduren ley goondinal ngal kawtuden ngaal, goondinal am semmbina on, ngal moodon du semmbina kam. <sup>13</sup> Sakiraabe, mido yidi paamon: kile keewde ngadumi anniya mi waran to moodon de mido faddaa faa hannden. Mido yidi warude faa danya ɓe kebumi hakkunde moodon saabe Almasiihu hono no kebirmi yimbe hakkunde lenyi goddi ni. <sup>14</sup> Tilay mi yaha to yimbe fuu, yimbe ngallu e wonbe ladde, to joomiraabe anndal e majjuabe. <sup>15</sup> Dum wadi de mido yidi waajaade on Kabaaru Lobbo oon, onon yimbe Roma du.

### *Haala baawde Kabaaru Lobbo*

<sup>16</sup> Mi semtirtaa Kabaaru Lobbo oon, sabo wo o baawde Laamdo faa hisina goondindo mo fuu: Al-huudiyankoobe tafon, de caggal duum, lenyi goddi fuu. <sup>17</sup> Sabo Kabaaru Lobbo oon ina ɓangina no Laamdo fonnditorii, ina ɓangina wo e goondinal tan neddo ndaardetee ponnditiido yeeso Laamdo, illa fuddoode faa e timmoode. Wo noon Binndi diin mbiiri: «Ponnditiido wuurdan goondinal.»\*

### *Haala tikkere Laamdo dow luttal yimbe*

<sup>18</sup> Tikkere Laamdo ina ɓanga illa dow kammu ina jippoo dow luttugol yimbe e oonyaare mubben fuu. Ibe kada goonga ɓangude saabe oonyaare mabbe ndeen. <sup>19</sup> Si goonga ko neddo waawi

---

\* **1:17** Habakuk 2.4.

anndude e Laamdo duum ina laabani 6e, sabo Laamdo hollii 6e dum. <sup>20</sup> Sabo gilla Laamdo tagi adunaaru ndu faa hannden, golle muudum ina bangina sifa muudum mo yi'ataake oon faa laaba, dum woni baawde makko faa abada deen e no o worri fuu. Saabe duum, yimbe been ngalaa ko 6e njaaboo fey. <sup>21</sup> Fay si taweede i6e anndi Laamdo, 6e teddiniraay dum no foti teddinireede noon, 6e njettaay mo du. Miilooji mabbe diin laatake boli, berde mabbe puuyde deen du ni66ii. <sup>22</sup> I6e njaara wo 6e jom'en hakkillo, jako wo 6e majju6e. <sup>23</sup> Be loomtinirii teddeengal Laamdo duumiido oon tooruungi nanndudi e yimbe maayoob6e e pooli e kulle de koyde nay e daasotoode.

<sup>24</sup> Saabe duum, Laamdo yoppidi 6e e muuyde yonkiji mabbe tuunde faa 6e kuyfini balli mabbe hakkunde mabbe. <sup>25</sup> Be loomtinirii Laamdo goongajo oon e fewre, 6e teddinii ko tagaa, 6e ndewi dum, 6e njoppi Tagudo oon. Oon woni jettetedeo faa abada! Aamiina. <sup>26</sup> Saabe duum, Laamdo yoppidi 6e e muuyde terde mabbe cemtiniide. Rew6e mabbe been mbattiti ko haani wadeede e balli mu6ben e ko haanaa. <sup>27</sup> Hono noon wor6e been du njoppi wondude e rew6e faa naati na muuyundura. Wor6e ina ngadundura ko semtinii, de 6e njomnitoree ley balli mabbe fodde majjere mabbe.

<sup>28</sup> Saabe ko 6e miilino anndude Laamdo walaa ko nafata duum, Laamdo yoppidi 6e e majjere mabbe, faa 6e ngadi ko neddo haanaa wadude. <sup>29</sup> I6e keewi oonyaare e bonanda e eelgal e nganyaandi fuu. I6e keewi kiram e warhoore e poofundural e jamba e anniya bondo. Wo 6e nyoo'oob6e yimbe, <sup>30</sup> wo 6e mbonkotoob6e,

wanyubé Laamđo. Wo 6e huyfinoobé yimbe, wo 6e mawninkiniibé, mantotoobé. Ibe piloo laabi kesi faa 6e ngada ko boni. Ibe calanoo saaraabé maabé. <sup>31</sup> Be ngalaa hakkillo, 6e koolnaaki, 6e voorbe berde, 6e ngalaa yurmeende. <sup>32</sup> Ibe anndi ko Laamđo yamiri: gadoowo golleeji di fuu ina haani maayde. Ammaa wanaa golleeji diin tan 6e ngadata, ibe njardoo wobbe du ngada di.

## 2

### *Haala jukkungo Laamđo*

<sup>1</sup> Ndelle, aan peloowo wobbe oon, mo laatidaa fuu a walaa ko njaabodaa. Sabo si a felii godđo, ada liba hoore maa, sabo aan du ada wada düm. <sup>2</sup> Eden anndi Laamđo ina saroo wadoobé hono golleeji diin fodde goonga. <sup>3</sup> Aan peloowo wadoobé iri golleeji diin tawee hono noon ngadirtaa, yalla ada sikki a dadan jukkungo sariya Laamđo ngoon naa? <sup>4</sup> Naa a jawdo moyyuki Laamđo mawki kiin, kam e munyal muudum e heese muudum naa? Yalla a faamaay moyyuki muudum ina yaare faa tuubaa? <sup>5</sup> Ammaa ko a joordo bernde, a caliido tuubude duum, ada waddana hoore maa tikkere Laamđo nyannde Laamđo banginta tikkere muudum e sariya mum ponnditiido oon. <sup>6</sup> Sabo Laamđo barjoto mono fuu golle muudum. <sup>7</sup> Wadoobé ko woodi e ley munyal, filotoobé darja e teddeengal e ko duumotoo been, keban nguurndam nduumiidam. <sup>8</sup> Ammaa filotoobé ko nafata ko'e mubben, saliibe goonga de ina kabbi e bonanda been, jukkungo naawngo kebata. <sup>9</sup> Torra e billaare ngoodanii gadoowo ko boni fuu: Alhuudiyankoobé tafon, de

lenyi godđi njokka. <sup>10</sup> Ammaa darja e teddeengal e jam ngoodanii gadoowo ko woodi fuu, Alhuudiyankoobe tafon, de lenyi godđi njokka. <sup>11</sup> Sabo Laamdo burdintaa yimbe.

<sup>12</sup> Kala gadoowo hakke mo anndaa Tawreeta Muusaa halkan tawa saroraaka Tawreeta oon. Katin du gadoowo hakke tawi na anndi Tawreeta, sarorte Tawreeta oon. <sup>13</sup> Yimbe ndaardataake fonnditiibe yeeso Laamdo e hettindanaade Tawreeta tan. Wo wadoobe ko Tawreeta wi'i been ndaardee wo fonnditiibe. <sup>14</sup> Be nganaa Alhuudiyankoobe been, e rafi mubben anndude Tawreeta fuu, si be ngadirii no Tawreeta oon wi'iri ni e ley muuyde ko'e mabbe, be kollii iбе njogii Tawreeta e ley hakkillooji mabbe fay si be ngalaa Tawreeta Muusaa oon. <sup>15</sup> Be kollii ko Tawreeta Muusaa oon yamiri duum ina winndaa e berde mabbe. Berde mabbe ina ceedanoo бе, wakkati wakkati miilooji mabbe na pela бе, wakkati gom du na laamna бе. <sup>16</sup> Dum bangowan nyannde Laamdo yamirta Iisaa Almasiihu saroo ko suudii ley berde duum, no fotirta e Kabaaru Lobbo mo mbaajotoomi oon.

### *No Alhuudiyankoobe ngorri e Tawreeta Muusaa*

<sup>17</sup> Aan, bi'udo wo a Alhuudiyanke, ada tuugii Tawreeta Muusaa, ada mantoro kawtal maa e Laamdo, <sup>18</sup> ada anndi muuyde Laamdo, ada waawi subaade ko woodi sabo a jannginaama Tawreeta oon. <sup>19</sup> A tannyorii wo a dowowo wumbe, wo a annoora wonbe e nimre been. <sup>20</sup> Ada waajoo бе njanngaay been, ada janngina sukaabe saabe ko njogidaa anndal e goonga faa hiбbi e ley Tawreeta Muusaa oon duum. <sup>21</sup> Woodi ndelle, ada tindina wobbe, yalla a tindintaa hoore maa naa? Ada

waajoo taa mbujjee, a wujjataa naa? <sup>22</sup> Ada wi'a taa njeenee, a jeenataa naa? Ada harmina tooruucci, a wujjataa ley cuudi majji toon naa? <sup>23</sup> Aan mantortoodo Tawreeta, a huyfintaa innde Laamdo e luttugol maa Tawreeta oon naa? <sup>24</sup> Dum wadi de Binndi diin mbi'i: «Onon ngadi de yimbe 6e nganaa Alhuudiyankooße been ina mbonkoo innde Laamdo.»\*

<sup>25</sup> Woodi, si ada hayba jamirooje Tawreeta, taadagol Alhuudiyankooße ina waawi nafude ma. Ammaa si ada lutta jamirooje deen, a laatake hono mo taadaaki ni. <sup>26</sup> Si mo taadaaki haybii jamirooje Tawreeta, wanaa Laamdo ndaar-dan joomum hono o taadiido nii naa? <sup>27</sup> Mo taadaaki de na hayba Tawreeta Muusaa oon, kam saroyte aan luttudo Tawreeta oon, fay si a taadiido anndudo Binndi diin. <sup>28</sup> Sabo wanaa ko yi'etee duum wadata neddo Alhuudiyanke jaati, wanaa ko golletee e 6anndu duum woni taadagol. <sup>29</sup> Wo ko yi'ataake duum wadata neddo Alhuudiyanke jaati, taadagol du ley bernde muudum tawetee. Wo Ruuhu gollata dum, wanaa binndi. Manoore neddo oon, wanaa to yimbe yuurata, wo to Laamdo nde yuurata.

### 3

<sup>1</sup> Ndelle, dume Alhuudiya'en 6urdi lenyi goddi? Dume woni nafaa taadagol? <sup>2</sup> Ina heewi e alhaaliiji fuu. Ko artii fuu, Laamdo halfinii 6e konngol muudum. <sup>3</sup> Goonga, wobbe maabbe koolnaaki. Yalla dsum ina waawi bonnude ko Laamdo wo koolniido duum naa? <sup>4</sup> Dum waawaa koy! Fay si

---

\* <sup>2:24</sup> Esaaya 52.5.

yimbe fuu wo fewoobe, tilay Laamdo kaa annditee wo goongante. Wo hono noon winndiraa:  
 «Fonnditaare maada ina annditee e ko kaalataa duum,  
 si a sardaama du fu, a liban.»\*

<sup>5</sup> Do mi haaldan hono no wobbe kaaldata ni: si oonyaare meeden ina 6eyda hollude fonnditaare Laamdo ndeen, noy mbi'eten? Yalla en mbi'an Laamdo wo oonyiido si jippinii tikkere muudum dow meeden naa? <sup>6</sup> Fay seeda! Sabo si Laamdo wo oonyiido, noy o sarortoo adunaaru ndu? <sup>7</sup> Goddo na waawi wi'ude faa hannden: si fewre am 6eydii hollude goongalaaku Laamdo faa dum mawninii teddeengal muudum, ko wadi mido saree hono wo mi luttoowo? <sup>8</sup> Si neddo na miilira nii fu, wi'an: «Ngaden ko boni faa ko woodi funta.» Won mbonkotoobe ina mbi'a enen du eden mbiira noon. Yimbe been kaa, jukkungo mudden ina foti e golle mudden.

### *No yimbe fuu ndonkiri laataade fonnditiibe*

<sup>9</sup> Ndelle, enen Alhuudiyankooße been, eden buri yimbe heddiibe naa? En furaa koy. Sabo mi hollii Alhuudiyanke e mo wanaa Alhuudiyanke fuu e ley hakkeei ngoni. <sup>10</sup> Wo hono no winndiraa:  
 «Walaa fuu ponnditiido, fay gooto,

<sup>11</sup> fay gooto walaa paamal,  
 fay gooto filataako Laamdo.

<sup>12</sup> Yimbe fuu mbosake laawol, fuu laatake bolbe.

Walaa fuu gadoowo ko woodi, fay gooto.»†

<sup>13</sup> «Kunndude mabbe ina nga'i hono caabeeje udditiide ni,

---

\* **3:4** Jabuura 51.6. † **3:12** Jabuura 14.1-3, 53.2-4.

demle ma  e ina kaala hiila.

Toni ma  e ina caawi tooke bolle.»‡

**14** «Kunndude ma  e ina keewi kuddi e haalaaji mettudi.»§

**15** «Koyde ma  e ina njaawi rufude yiyam.

**16** Bonanda e mettorgal ina njokki  e to  e njahata fuu,

**17**  e anndaa laawol jam.»\*

**18** «Kulol Laamdo walaa e berde ma  e fey.»†

**19** Ed  en anndi huunde fuu ko Tawreeta Muusaa oon wi'i, wo won  e e ley muudum  een haaldi, faa kunndude fuu ndeyyinoo, de yim  e adunaaru fuu paama ina poti e hiiteede kiite Laamdo. **20** Sabo fay gooto ndaardataake ponnditiido yeeso Laamdo saabe haybude muudum Tawreeta Muusaa. Si goonga, golle Tawreeta oon haadii e anndinde yim  e ko woni hakke.

### *No yim  e laatortoo fonnditiibe yeeso Laamdo*

**21** Ammaa joonin Laamdo  anginii no fonnditaare muudum hebirtee ko wanaa haybude Tawreeta Muusaa. Tawreeta oon e dewte annaba  e  een kaaliino kabaaru majjum: **22** o ndaardan goondin  e  een fuu wo fonnditiibe saabe goondinal mub  en Iisaa Almasiihu. Sabo walaa ko senndi yim  e: **23** yim  e fuu luttii, kewtaay yottaade darja Laamdo. **24** Ammaa Laamdo tiigorake  e fonnditiibe e dokkal saabe hinney muudum. O wadirii dum e Iisaa Almasiihu dimfindo  e oon. **25** Wo kam

---

‡ 3:13 Jabuura 5.10, 140.4.    § 3:14 Jabuura 10.7.    \* 3:17

Esaaya 59.7-8.    † 3:18 Jabuura 36.2.

Laamdo wadi kirsamaari ittoori hakkeejit, faa ittiri hakkeji goondinbe diin e yiyyam muudum. Hono noon Laamdo holli ri fonnditaare muudum, fay si jukkaakino luttube arande <sup>26</sup> saabe munyal muudum. O wadirii dum faa o bangina fonnditaare makko ley jamaanu mo ngonden o, faa o holla wo o ponnditiido, woodi du, neddo fuu goondindo lisaa, o ndaardan dum ponnditiido.

<sup>27</sup> Ndelle, dume neddo waawi mantoraade? Walaa! Haybude Tawreeta Muusaa oon wadi dum naa? Wanaa! Goondinal tan wadi dum!  
<sup>28</sup> Sabo miden anndi neddo ndaardete ponnditiido saabe goondinal muudum, wanaa saabe haybugol muudum Tawreeta. <sup>29</sup> Naa Laamdo wo Laamdo Alhuudiyankoobe tan naa? Wanaa wo o Laamdo lenyi goddi diin du naa? Goonga, wo o Laamdo lenyi goddi diin du. <sup>30</sup> Sabo Laamdo gooto woodi, ndaardoowo taadiibe been fonnditiibe saabe goondinal muubben, be taadaaki been du o ndaardan dum'en fonnditiibe saabe goondinal muubben. <sup>31</sup> Ndelle, min ngadii Tawreeta Muusaa oon wo bolum saabe goondinal naa? Fay seedsa! Min boldinaay mo, min tabintinii mo!

## 4

### *Haala goondinal Ibrahiima*

<sup>1</sup> Dume mbi'eten dow Ibrahiima maami en oon? Dume o ekitii dow kabaaru oon? <sup>2</sup> Si tawino o laatake ponnditiido saabe golleeji makko diin, ndeen imo waawunoo mantaade. De yeeso

---

<sup>†</sup> **3:25** Haala kirsamaari kaan, e geresankoore ina waawi hollude kirsamaari ittoori hakke, ittoori nganyaandi hakkunde yimbe e Laamdo du.

Laamdo kaa o waawaa mantaade. <sup>3</sup> Sabo Binndi dñin mbi'ii: «Ibrahiima goondñinii Laamdo, de Laamdo hiisori mo saabe majjum wo o ponnditiido.»\* <sup>4</sup> Woodi, si neddo gollii fu, njobdi muudum hiisortaake hono moyyere, wo ko tilsi yoweede. <sup>5</sup> Ammaa yeeso Laamdo neddo waawaa yowude jikke muudum dow golle mum. Sanaa o goondina Laamdo baawdo nanngirde bonþe wo fonnditiibe oon, ndeen goondinal makko hiisete wo fonnditaare. <sup>6</sup> Noon Daawda du haaliri dow barke neddo mo Laamdo hiisori ponnditiido baka golleeji ngalaa. O wi'ii:

<sup>7</sup> «Barke woodanii yimþe 6e lutti muþben njaafaa,  
6e hakkeeji muþben mooytaa.

<sup>8</sup> Barke woodanii neddo fuu mo Joomiraado  
hiisaaki hakkeeji muudum.»†

<sup>9</sup> Yalla taadiiþe been tan njeyi barke oon naa? Yalla 6e taadaaki been ngalaa toon naa? En mbi'ii: wo saabe goondinal Laamdo hiisori Ibrahiima wo ponnditiido. <sup>10</sup> Ndelle, noy Ibrahiima worrunoo nde ndaardanoo wo ponnditiido ndeen? O taadiido naa o wanaa? Si goonga, o ndaardaama o ponnditiido gilla o taadaaki. <sup>11</sup> Taadagol makko du wo maande holloore fonnditaare makko saabe goondinal ngal o woodunoo gilla o taadaaki. Hono noon, o laatorii maama goondinþe 6e taadaaki been fuu, faa been du kiisoree wo ponnditiibe. <sup>12</sup> Kanko woni baaba taadiiþe du, de 6e kaadaay e taadagol tan. Wo 6e jokkuþe laawol makko du, kanko baaba meeden Ibrahiima goondindo Laamdo gilla taadaaki.

---

\* **4:3** Fuddooode 15.6. † **4:8** Jabuura 32.1-2.

*Amaana mo Laamđo wadani Ibrahiima*

<sup>13</sup> Laamđo aadake hokkude Ibrahiima e yuwdi muudum adunaaru ndu. Amaana oon daraaki dow ko Ibrahiima jokki Tawreeta oon, ammaa darake dow fonnditaare nde Ibrahiima hebi saabe goondinal muudum ndeen. <sup>14</sup> Sabo si amaana oon darake dow jokkugol Tawreeta fu, goondinal laatake 6olal, woodi amaana oon du nafataa. <sup>15</sup> Sabo jamirooje Tawreeta deen wo jukkungo Laamđo ngaddata. De si jamirooje ngalaa fu, lutti du ngalaa.

<sup>16</sup> Ndelle, amaana Laamđo oon wo dow goondinal yowii, faa laatoo moyyere makko. O tabitan e yuwdi Ibrahiima fuu, wanaa hokkaabé Tawreeta tan, ammaa goondinirbe no Ibrahiima goondiniri ni been fuu. Kanko woni maama meeden en fuu. <sup>17</sup> Dum ina hawra e ko winndaa dow Ibrahiima: «Mi wadii ma baaba lenyi keewdi.»‡ Wo noon dum laatorii yeeso Laamđo mo Ibrahiima goondini, kokkoowo maaybe nguurndam, jamiroowo ko walaa duum laatoo. <sup>18</sup> Fay si Ibrahiima walaa daliili dow ko yowa jikke muudum hebude yuwdi katin, o heddiim ogoondini. Wo nii o laatorii baaba lenyi keewdi no Laamđo wiirunoo mo ni: «Hono nii yuwdi maada fotata.»§ <sup>19</sup> Ibrahiima duubi muudum ina ngada hono hemre, ammaa goondinal mum lokkidaay nde yi'unoo 6anndu mum naywii, deekum Saaratu oon du naywii, faltake rimude. <sup>20</sup> O sikkitiraay amaana Laamđo oon. Ko laatii dey, goondinal makko 6eydii semmbe, o teddini Laamđo. <sup>21</sup> O tannyorii Laamđo ina waawi

---

‡ **4:17** Fuddoode 17.5. § **4:18** Fuddoode 15.5.

tabintinde amaana muudum. <sup>22</sup> Saabe duum, «Laamdo hiisori mo wo o ponnditiido.» <sup>23</sup> Ko Binndi diin mbi'i «Laamdo hiisorake mo wo o ponnditiido» duum, wanaa saabe makko tan winndiraa. <sup>24</sup> Idum winndiraa saabe meeden enen du. Laamdo hiisorto en fonnditiibe, enen goondinbe Laamdo iirtinii Joomiraado meeden Iisaa e maayde oon. <sup>25</sup> O hokkitiraama, o maayi saabe lutti men, de o iirtinaa faa ndaardeden fonnditiibe.

## 5

### *Haala jam hakkunde meeden e Laamdo*

<sup>1</sup> Ko kebusen ndaardeede fonnditiibe saabe goondinal duum, wadii jam hakkunde meeden e Laamdo saabe Joomiraado men Iisaa Almasiihu. <sup>2</sup> Kam udditani en dammbugal hinney Laamdo mo ngonden joonin saabe goondinal meeden. Ley majjum eden ceyoroo jikke wondude e darja Laamdo. <sup>3</sup> Wanaa dum tan, eden ceyoroo torraaji meeden du sabo eden anndi torraaji ndimata munyal, <sup>4</sup> munyal du rima ne'aaku, ne'aaku du rima jikke. <sup>5</sup> Jikke oon du waasataake, sabo Ruuhu Ceniido mo kokkaden oon hebbinii en njinngu Laamdo.

<sup>6</sup> Sabo ley wakkati mo Laamdo subii oon, nde tawanoo en ngalaano semmbe ndeen, Almasiihu maayani en, enen luttube Laamdo. <sup>7</sup> Ina tiidi ko goddo jaba maayande neddo fay si wo ponnditiido. Ina hasii goddo suusa maayande lobbo. <sup>8</sup> Ammaa Laamdo holpii no yidiri en ko Almasiihu maayanii en gilla en luttube. <sup>9</sup> Joonin ko ndaardaden en fonnditiibe saabe yiyyam makko duum, tannyoral en

ndadan tikkere Laamdo du saabe makko. <sup>10</sup> Sabo nde laatinoden waybe Laamdo ndeen, Laamdo rewrightinii en e muudum saabe maayde Biyum. Ko ndewrintinaden e makko joonin duum, sikke fuu walaa en kisinte saabe nguurndam Biyiko oon du. <sup>11</sup> De wanaa duum tan, ammaa eden ceyoroo Laamdo saabe Joomiraado men Iisaa Almasiihu, dewrintindo en e Laamdo oon.

### *No Aadama nannditirta e Almasiihu*

<sup>12</sup> Joonin le, wo saabe neddo gooto de hakke naati e adunaaru, woodi hakkeeji diin du ngaddi maayde. Noon maayde ndeen yottorii yimbe fuu, sabo be fuu be luttii. <sup>13</sup> Si goonga, gilla Tawreeta Muusaa oon jippinaaka, hakkeeji ina ngoodi e adunaaru ndu. De si jamirooje Tawreeta ngalaa, hakkeeji kiisataake. <sup>14</sup> Gilla e Aadama faa e Muusaa, walaa fuu mo maayde jaalaaki, fay yimbe be ngadaay hakke iri mo Aadama wadi nde luttunoo yamiroore Laamdo. Aadama oon wo alhaali garoowo oon.

<sup>15</sup> Ammaa en kaanaa fonndude luttal Aadama e dokkal Laamdo. Goonga, yimbe heewbe maayii saabe luttal neddo gooto. Ammaa hinney Laamdo, kam e dokkal ngal hokki yimbe heewbe saabe neddo gooto ina buri dum fuu manngu. Neddo oon woni Iisaa Almasiihu. <sup>16</sup> Katin du en kaanaa fonndude ko dokkal Laamdo rimata duum e ko luttal neddo gooto rimata duum. Sabo sariya wadaama dow luttal gootal ngaal, de dum waddi jukkungo. Ammaa moyyere Laamdo mawnde wari caggal lutti keewdi, de dum waddi fonnditaare. <sup>17</sup> Wo saabe luttal neddo gooto maayde laamorii yimbe. Ammaa dum waawaa fonndeede

e laamagol heboobe moyyere Laamdo heewnde e dokkal fonnditaare been. Been laamortoo e nguurndam saabe neddo gooto. Oon woni Iisaa Almasiihu.

<sup>18</sup> Ndelle, no luttal neddo gooto waddirani yimbe fuu jukkungo ni, hono noon du gollal ponnditingal ngal neddo gooto golli ina laatanoo yimbe fuu fonnditaare e nguurndam. <sup>19</sup> No salaare neddo gooto wadiri yimbe heewbe luttube ni, hono noon dowtaare neddo gooto du wadiroyta heewbe ndaardee fonnditiibe.

<sup>20</sup> Tawreeta naatii faa lutti 6eyda annditeede. Ammaa fay ko lutti keewi diuum fu, hinney Laamdo buri heewude. <sup>21</sup> Hono no luttal laamorii de waddi maayde ni, hono noon hinney Laamdo oon du laamortoo saabe fonnditaare, faa yaara en to nguurndam nduumiidam saabe Iisaa Almasiihu Joomiraado meeden.

## 6

### *Haala maaydude e Almasiihu e wiurdude e muudum*

<sup>1</sup> Ndelle, dume mbi'eten? En keddoto e hakkeeji yalla hinney Laamdo ina 6eydoo naa? <sup>2</sup> Kayto! Dum waawaa laataade! En ceedii e hakkeeji faa laatoden maaybe to majji. Ndelle noy mbuurdirten ley majji katin? <sup>3</sup> Odon anndi lootagal meeden batisima kabunggal en e Iisaa Almasiihu ngaal hawtii en e maayde muudum du. <sup>4</sup> Ndelle, e ley lootagal batisima ngaal en maaydii e makko, en uwidaama e makko. Ndeen du, no Almasiihu iirtoori e hakkunde maaybe saabe baawde Baabiiwo teddude deen, enen du en mbuurda

noon nguurndam kesam. <sup>5</sup> Sabo si en kawtii e makko ley maayde nanndunde e maayde makko, en kawtan e makko ummitagol nanndungol e ngol makko. <sup>6</sup> Ndelle eden paami dum do: tomottaaku meeden kiinngu nguun tontidaama e makko dow leggal palaangal, faa baawde balli men luttooji diin kalka, faa tawee en nganaa maccube hakke katin. <sup>7</sup> Sabo si neddo maayii fu, yaltii e hawju hakke. <sup>8</sup> Ko maayduden e Almasiihu duum, eden koolii en mbuurdan e makko du. <sup>9</sup> Sabo eden anndi ko Almasiihu iirtii e hakkunde maaybe duum, maayataa katin. Maayde walaa baawde dow makko katin. <sup>10</sup> Ko o maayi duum, wo saabe hakkeeji yimbe nde wootere faa abada. Joonin ko o wuuri duum, wo muuyde Laamdo o wuurani. <sup>11</sup> Hono noon, onon du, laatee maaybe be hakkeeji laamaaki, de laatanodon Laamdo wuurube e kawtal Iisaa Almasiihu.

<sup>12</sup> Ndelle, taa accee hakke laamoo balli moodon maayooji diin faa njokkon muuyde majji. <sup>13</sup> Taa kokkitiree terde balli mon hakke, taa ngadon de kabtitirde oonyaare. Kokkee ko'e mon Laamdo, sabo on iirtinaama e maayde, odon mbuuri. Kokkee terde moodon Laamdo faa de laatoo kabtitirde fonnditaare. <sup>14</sup> Hakke laamataako on katin, sabo on ngalaa ley jamiroje Tawreeta. Wo ley hinney Laamdo ngondon.

### *No yimbe laatortoo gollooße dowtaniibe fonnditaare*

<sup>15</sup> Ndelle noy? Yalla en ngadan hakke sabo ley hinney ngonden wanaa ley Tawreeta naa? Kayto! Dum waawaa laataade! <sup>16</sup> On paamaay naa? Si on kokkii goddo ko'e mon faa ngollanon

dum, dowtanodon dum fu, on laatake maccube mo dowtantonodon oon. Ndelle, naa on laatake maccube hakke jaaroowo on e maayde, naa on dowtanake Laamdo jaaroowo on e fonnditaare.

<sup>17</sup> Ammaa jettooje ngoodanii Laamdo! Arande wo on maccube hakke, de joonin on laatake jokkirbe laawol ngol njannginadon ngool e berde laabude.

<sup>18</sup> On ndimcinaama e hakke, on laatake maccube fonnditaare. <sup>19</sup> Mido haalda do no yimbe paamirta ni saabe lokkaaku moodon. Arande odon ngat-tunoo terde mon ley hawju tuundi e bonanda faa ko boni beydoo. Joonin kaa, ngadiron de noon ley hawju fonnditaare faa ngollon ko senii.

<sup>20</sup> Nde ngonnodson ley maccungaaku hakke ndeen, on laataakino golloobe dowtaniibe fonnditaare. <sup>21</sup> Nafaa oye kebudon e majjum wakkati oon? Fay huunde, si wanaa ko cemtirton hannden duum, sabo cakitte majjum wo maayde. <sup>22</sup> Ammaa joonin, on ndimcinaama e maccungaaku hakke, on laatake maccube Laamdo. Nafaa mo kebudon wo joonnde seniinde, de cikitte majjum du wo nguurndam nduumiidam. <sup>23</sup> Sabo njobdi hakke wo maayde, ammaa dokkal Laamdo wo nguurn-dam nduumiidam e ley kawtal Iisaa Almasiihu Joomiraado meeden.

## 7

### *No yimbe kabbitiraa e jamirooje Tawreeta*

<sup>1</sup> Sakiraabe, mido haalana on onon anndube Tawreeta Muusaa. Odon anndi jamirooje Tawreeta na ndawrana neddo haddi nguurndam muudum tan. <sup>2</sup> Hono nii debbo banjaado du, jamirooje kabbitiri dum e gorum oon si gorum

oon ina wuuri. Ammaa si gorum oon maayii fu, o habbitaama e jamirooje kabunoode mo deen. <sup>3</sup> Si goddo bañji mo e ley nguurndam goriiko oon, wi'ete wo o jeenoowo. Ammaa si goriiko oon maayii, jamirooje deen njoppan mo, o wi'ataake jeenoowo si o bañjundurii e gorko goddo. <sup>4</sup> Sakiraabe am, onon du, fodde Tawreeta Muusaa, on laatake maaybe. On yuwii e ley muudsum saabe banndu Almasiihu tontanaandu on nduun faa njeyadon e muudsum. Kam woni mo Laamdo iirtini e hakkunde maaybe oon faa ngollen ko welata Laamdo. <sup>5</sup> Wakkati nde ngonnoden ley hawju muuyde terde ndeen, muuyde meeden bonde de Tawreeta ummini deen ina ngolla e galli men faa njaara en to maayde. <sup>6</sup> Ammaa joonin, en ndimidaama e Tawreeta. Fodde Tawreeta kabunoodo en oon, en laatake maaybe, faa mbaawen gollande Laamdo dow laawol kesol ngol Ruuhu muudsum hawjii, wanaa dow laawol kiinngol ngol binndi njamirnoo.

### *No Tawreeta Muusaa anndiniri ko woni luttal*

<sup>7</sup> Ndelle, dume mbi'eten? Tawreeta Muusaa oon wo hakke naa? Wanaa koy! Ammaa, si Tawreeta walaa fu, mi anndaano ko woni hakke. Sabo mi anndaano ko woni muuyude ko jeyaa si Tawreeta wi'aayno: «Taa muuyu ko a jeyaa!» <sup>8</sup> Ammaa hakke adii ko jamirooje kadi diuum, de wadi e am siyiji muuyde terde fuu. Sabo si Tawreeta walaano fu, hakke wo huunde waatunde. <sup>9</sup> Miin e hoore am, nde mi anndaano Tawreeta arande ndeen, mido wuurnoo, ammaa ko kadaadi diin ngari diuum, hakkeeji laatii buurdii, <sup>10</sup> de miin du, maayumi. Jamirooje kaanunoode wadande kam

nguurndam deen, laatii jaarooje kam to maayde. <sup>11</sup> Sabo hakke adii kadaadsi diin, de hiili kam, wardi kam di. <sup>12</sup> Ndelle, Tawreeta Muusaa wo ceniido, jamirooje deen du wo ceniide, wo ponnditiide, wo moyyude.

<sup>13</sup> Ndelle, yalla ko woodi waddanii kam maayde naa? Dum waawaa laataade! Wo hakke wadi dum. Hono nii hakke annditirtee wo hakke jaati, sabo o nawtorake ko woodi faa rimana kam maayde. Ndelle, jamirooje deen kolli hakke oon wo huunde bonnde faa faltii haddi.

### *Haala durwugol neddo e hakke*

<sup>14</sup> Eden anndi Tawreeta Muusaa oon to Ruuhu Ceniido yuuri. De miin kaa, mi adunanke tan mo hakke dawrani. <sup>15</sup> Sabo mi faamaay ko ngadammi duum: ko njidumi wadude duum, mi wadataa dum, de ko mbanyumi duum, wo duum ngadammi. <sup>16</sup> Si mido wada ko mi yidaa wadude duum, ina holla mi jabii jamirooje Tawreeta deen ina mboodi. <sup>17</sup> Ndelle, wanaa miin wadirta noon, wo hakke gondo ley am. <sup>18</sup> Mido anndi e ley am, dum woni e ley banndu am, ko woodi walaa e muudum. Yidude wadude ko woodi ina woni e am, de mi waawaa wadude dum. <sup>19</sup> Mi wadataa ko woodi ko njidumi duum, wo ko boni ko mi yidaa duum ngadammi. <sup>20</sup> Ammaa si mi wadii ko mi yidaa, wanaa miin gollirta noon, wo hakke gondo ley am oon. <sup>21</sup> Ko taykiimi dey: wakkati fuu mido yidi wadude ko woodi, de ko boni ina woni e am, ina hada kam. <sup>22</sup> E ley bernde am mido seyoro Jamirooje Laamdo deen. <sup>23</sup> Ammaa mido maata al'aada bondo e ley banndu am, ina haba e laawol ngol hakkillo am wi'i na woodi ngool. Al'aada

bondo oon ina wada kam maccudo hakke gondo ley 6anndu am oon. <sup>24</sup> Kay, mido yurminii! Moy waawi dannude kam e 6anndu yaarooru kam to maayde ndu? <sup>25</sup> Jettooje ngoodanii Laamdo saabe Joomiraado meeden Iisaa Almasiihu!

Ndelle miin, e ley hakkillo am wo mi maccudo jamirooje Laamdo, ammaa e 6anndu am wo mi maccudo laawol hakke.

## 8

### *Haala nguurndam kawtudam e Ruuhu Laamdo*

<sup>1</sup> Joonin kaa, jukkungo fuu walaa e hawtuþe e Iisaa Almasiihu been, <sup>2</sup> sabo baawðe Ruuhu kokkooje en nguurndam saabe Iisaa Almasiihu deen ndimdinii en e baawðe hakke e maayde fuu. <sup>3</sup> Ko Tawreeta Muusaa waawaayno wadude saabe lokkaaku balli men, wo duum Laamdo wadi. O nuli Biyyiko e ley tagaadi nanndundi e bïbbe-Aadama jom'en hakkeeji been faa itta hakke. E ley tagaadi ndiin o jukkii hakke golloowo e ley balli men. <sup>4</sup> Dum fuu wo faa laabæl ngal Tawreeta yamiri ngaal hiðba e dow meeden, enen jokkuþe Ruuhu 6e nganaa jokkuþe muuyde terde been. <sup>5</sup> Jokkuþe muuyde terde been, muuyde terde na ndawrana hakkillooji muðben. De jokkuþe Ruuhu been, wo Ruuhu dawranta hakkillooji muðben. <sup>6</sup> Hakkillo jokkoowo muuyde terde muudum, na waddana joomum maayde. Hakkillo jokkoowo ko Ruuhu jeyi du, na waddana joomum nguurndam e jam. <sup>7</sup> Sabo hakkillo jokkoowo muuyde terde muudum tan ina wanyi Laamdo. Joomum dowitzantaako Jamirooje Laamdo deen. Si goonga du, waawaa.

**8** Jokkuße muuyde terde been mbaawaa welude Laamdo.

**9** De onon le, on njokkataa muuyde terde, ammaa odon njokka Ruuhu, si goonga fu Ruuhu Laamdo ina woni ley berde moodon. Neddo fuu mo walaa Ruuhu Almasiihu oon, waldaa e Almasiihu. **10** Kaa si Almasiihu ina woni e moodon, fay si taweede balli mon wo maaydi saabe hakke, yonkiji mon kaa wo buurdi saabe on ndaardaama on fonnditiibe. **11** Si Ruuhu Laamdo ina woni ley berde moodon, Laamdo buurtindo Iisaa Almasiihu e hakkunde maaybe oon, hokkan balli mon maayooji diin nguurndam, hokkirian dum Ruuhu muudum gondo ley berde mon oon.

**12** Ndelle, sakiraabe, won ko tilsan en, de dum wanaa jokkude muuyde terde. **13** Sabo si on mbuurdii odon njokka muuyde terde, on maayan. Ammaa si on mbardii muuydedeen Ruuhu Laamdo fu, on mbuuran. **14** Be Ruuhu Laamdo dowata fuu wo bïbïe Laamdo. **15** Laamdo hokkaay on Ruuhu gadoowo on maccube faa ngarton e kulol. O hokkii on Ruuhu gadoowo on bïbïe Laamdo. Kam wadata faa noddiren Laamdo «Abba». **16** Ruuhu oon e hoore muudum na hawta e berde meeden faa laamna en wo en bïbïe Laamdo. **17** Si en bïbïe, wo en ronoobe du. En ndonan ko Laamdo aadinoo duum, en ndondan e Almasiihu du. Sabo sini en njardi torra e makko fu, en kebidan e makko teddeengal du.

### *Haala teddeengal garoowal*

**18** Mi hiisake torraaji wakkati joonin mbaawaa fonndeede e teddeengal ngal Laamdo banginanta

en. <sup>19</sup> Si goonga, tagoore fuu ina heppi nyannde nde Laamdo ɓanginta ɓibbe muudum ndeen. <sup>20</sup> Sabo tagoore ndeen ina faddee hissinde ko nde jeyi gollude. Wanaa e muuyde mayre dum wadaa, wo Laamdo muuynoo dum. Ammaa jikke ina heddii, <sup>21</sup> sabo tagoore ndeen rimdinte e maccungaaku nyolngu, yaaree e ley ndimaaku e teddeengal ngal ɓibbe Laamdo ndesanaa. <sup>22</sup> Sabo eden anndi, faa joonin tagoore ndeen fuu ina uuma ina tampi e naawalla ɿatawere. <sup>23</sup> Wanaa ko tagaa tan uumata, enen hebirbe Ruuhu Laamdo oon hono dokkal Laamdo artiingal, enen du eden uuma. Eden keppi Laamdo wadaay en ɓibbe muudum, de rimdina galli men. <sup>24</sup> En kisinaama, de wo ley jikke dow ko warata tafon. De jikke kebaado selii laataade jikke, sabo neddo yowataa jikke e dow ko hebi. <sup>25</sup> Ammaa si eden njowi jikke e dow ko en kebaay tafon, en ndoomiran dum munyal.

<sup>26</sup> Katin du, Ruuhu waran na walla en e lokkaaku men. Sabo si goonga, en anndaa no kaanden wadirde du'aare ni. Ammaa Ruuhu oon e hoore muudum nyaaganto en Laamdo, nyaagorano en uumaali ɓurdi haalaaji luggude. <sup>27</sup> Laamdo kumpitiido ko woni ley berde men oon du ina anndi anniya Ruuhu, sabo wo e muuyde makko Ruuhu oon nyaagirantoo seniibe been.

<sup>28</sup> Eden anndi Laamdo ina gollira huunde fuu faa laatanoo yidube dum ko woodi, ɓe o noddi fodde anniya makko. <sup>29</sup> Sabo ɓe Laamdo anndi gilla tagaaka been, o fodanake dum'en nanndude e Biyiiko oon, faa Biddo oon laatoo afo ardiido dow sakiraabe heewbe. <sup>30</sup> Katin du ɓe o fodanii been, o noddii dum'en, ɓe o noddi been, o tiigorake

dum'en fonnditiibe, 6e o tiigorii fonnditiibe been du, o hokkii dum'en ngedu muubben e teddeengal makko.

### *Haala njinngu Almasiihu*

<sup>31</sup> Caggal dum fuu, dum mbi'eten? Si Laamdo ina wondi e meeden, moy waawani en? <sup>32</sup> Kanko, fay Biyiiko oon e hoore muudum o hadaay en, o hokkitirii dum saabe meeden en fuu. Si noon woni moyyere makko, wanaa o hokkidan en e muudum huunde fuu naa? <sup>33</sup> Moy yaarata 6e Laamdo subii been sariya? Fay gooto, sabo Laamdo tiigorake 6e fonnditiibe! <sup>34</sup> Moy waawi felude 6e yeeso sariya? Fay gooto, sabo Iisaa Almasiihu maayii, ko buri dum du, o iirtake. Imo joodii gere nyaamo Laamdo, imo nyaaganoo en. <sup>35</sup> Dume waawi senndude en e njinngu Almasiihu? Tiidallaaji naa, billaare naa, torra naa, yolbere naa, kolndam naa, masiiba naa, maa kaafaahi naa? <sup>36</sup> Wo hono no Binndi diin mbiiri:

«Saabe maada miden nesa maayde  
nyannde fuu,

miden ndaardee hono baali kirseteedi ni.»\*

<sup>37</sup> Ammaa e ley majjum fuu, saabe jiddo en oon, eden buri fay jaalotoobe. <sup>38</sup> Sabo mido tannyori, wanaa maayde, wanaa nguurndam, wanaa malleyka'en, wanaa laamu, wanaa ko wari joonin, wanaa ko waroya, wanaa semmbe, <sup>39</sup> wanaa ko woni faa dow, wanaa ko woni faa ley, huunde fuu ko tagaa waawaa senndude en e njinngu ngu Laamdo wadani en ley kawtal meeden e Joomiraado men Iisaa Almasiihu.

---

\* **8:36** Jabuura 44.23.

**9***Haala lenyol ngol Laamdo subii*

<sup>1</sup> Wo goonga kaalammi miin kawtudo e Almasiihu, mi fenataa. Bernde am nde Ruuhu Ceniido dōwata ndeen, ina seedanoo kam mido haala goonga. <sup>2</sup> Bernde am ina woodi met-torgal cattungal, nde selataa naawude <sup>3</sup> saabe Alhuudiyankoobe been. Mi jabanno laataade kudaado mi seeda e Almasiihu miin e hoore am si ina nafannoo sakiraabe am 6e kawtumi yuwdi been. <sup>4</sup> Been ngoni Israa'iila'en. Laamdo wadi 6e bībēe muudum, holli 6e teddeengal muudum. Kambe njeyi aadiiji diin e Tawreeta Muussaa oon. Wo kambe Laamdo anndini no 6e ndewirta dum, kambe Laamdo wadani amaanaaji muudum. <sup>5</sup> Kambe yuuri e maamiraabe Israa'iila arandeebe been. Almasiihu du, neddaaku muudum yuuri e lenyol ngool. Jettooje ngoodanii Laamdo tiimudo huunde fuu faa abada! Aamiina.

<sup>6</sup> Dum fuu wanaa wi'ude konngol Laamdo ngool hunngake laataade. Sabo wanaa yuuruþe e Israa'iila been fuu ngoni Israa'iilankooße, <sup>7</sup> wanaa yuuruþe e Ibrahiima been fuu ngoni bībēe muudum jaati. Sabo Laamdo wi'ii Ibrahiima: «Wo faro Isiyaaka yuwdi maa hisortee.»\* <sup>8</sup> Inan ko dum yidi wi'ude: wanaa bībēe Ibrahiima rimiraabe no yimþe fuu ndimirtee nii ngoni bībēe Laamdo, ammaa wo rimiraabe saabe amaana been tiigoraa wo yuwdi makko. <sup>9</sup> Sabo Laamdo wadii amaana e haalaaji diin, wi'i, «Mi wartan e hono wakkati o mawuuri, de Saaratu heban biddo

---

\* **9:7** Fuddooode 21.12.

gorko.»† <sup>10</sup> Wanaa ñum tan. Ndaaren no Rebeka hooyiri reedu 6ibbe dido du. Baaba mabbe wo gooto, Isiyaaka, maami en oon. <sup>11-12</sup> Gilla 6ibbe been ndimaaka sakko 6e ngada ko woodi naa ko boni, ndeen Laamdo wi'i Rebeka: «Mawniwo oon laatoto maccudo minyiiwo oon.»‡ O wadirii noon faa anniya makko dow subagol tabita. Subagol makko ngool yowaaki e golle yimbe, wo e Laamdo noddowo oon ngol yowii. <sup>13</sup> Wo noon Binndi diin mbiiri: «Yaakuuba korsinmi, de Isuwa mbanyumi.»§

<sup>14</sup> Ndelle, dume mbi'eten? Laamdo wo oonyiido naa? Kayto! Fay seeda! <sup>15</sup> Inan ko o wi'i Muusaa: «Mi hinnoto mo muuyumi hinnaade, mi yurmoto mo muuyumi yurmaade.»\*

<sup>16</sup> Ndelle, subagol makko yowaaki e muuyde neddo naa e tinnaare muudum, ammaa wo dow Laamdo jurmotoodo oon ngol yowii. <sup>17</sup> Sabo e ley Binndi diin, Laamdo wi'ii Fira'awna: «Ko ngadirmaami kaananke dey, faa mi hollira baawde am e maada, katin du faa innde am gooynee e adunaaru ndu fuu.»† <sup>18</sup> Ndelle, Laamdo yurmoto mo muuyi, yoornan bernde mo muuyi.

<sup>19</sup> Ndelle on yaman kam: «Si wo noon worri fu, dume Laamdo felirta yimbe? Moy waawi salaade muuyde makko deen?» <sup>20</sup> Aan 6ii-Aadama oon, wo a moy faa njeddaa Laamdo? Yalla loonde mahaande ina yama mahudo ñum oon: «Ko wadi de mahirdaa kam ni?»? <sup>21</sup> Mahoowo loode ina waawi wadude e loope deen ko yidi fuu: e

---

† 9:9 Fuddoode 18.10, 14.    ‡ 9:11-12 Fuddoode 25.23.    § 9:13

Malakiya 1.2-3.    \* 9:15 Wurtagol 33.19.    † 9:17 Wurtagol 9.16.

loopal gootal o maha loonde gollirteende ko teddi,  
o maha wonnde du gollirteende ko hebaa fuu.  
**22** Woodi, fay si taweede Laamdo muuyi sanginde  
tikkere muudum e baawde muudum, o munyanii  
be o tikkani been munyal cattungal, dum woni  
haandube e halkude been. **23** Owadirii noon du faa  
o bangina keewal darja makko dow be o yurmotoo  
been, be o segilanii gilla ko 60oyi faa ngonda e  
darja makko. **24** Dum woni enen be o noddi been.  
De wanaa e ley Alhuudiyankooōe tan, wo e ley  
lenyi godsi diin du. **25** Dum woni ko Laamdo wi'i  
e annabi Hoseya:

«Yimbe be nganaa yimbe am,  
mi noddiran be yimbe am,  
yimbe be korsinaaka been,  
mi noddiran be yimbe am horsube.

**26** Katin du, nokku do be mbi'etee be nganaa yimbe  
am,

doon be inndiroytee biibbe Laamdo buurdo.»‡

**27** Annabi Esaaya du haalii haala Israa'ilankooōe,  
wi'i: «Fay si biibbe Israa'iila keewiri no njaa-  
reendi maayo ni, seeda maabbe tan hisintee, **28** sabo  
Joomiraado tabintinan konngol muudum dow  
adunaaru, hiibbinan ngol fuu law.»§ **29** Katin du wo  
nii Esaaya wiirunoo gilla arande:

«Sini Joomiraado jom baawde fuu oon accidaayno  
en yuwdi,

tawanno en laatake hono wuro Sodoma ni, en  
nanndii e wuro Gomoora.»\*

---

‡ **9:26** Hoseya 2.25, 2.1. § **9:28** Esaaya 10.22-23. \* **9:29** No  
Sodoma e Gomoora kalkiraa ni winndaama e ley Fuddfoode 19.1-29.

*No Laamdo ndaardata goondinbe Iisaa been fonnditiibe*

<sup>30</sup> Ndelle, dume mbi'eten? Inan ko mbi'eten: yimbe 6e nganaa Alhuudiyankoobe 6e pilaakino fonnditaare been, 6e kebii fonnditaare, dum woni fonnditaare saabe goondinal. <sup>31</sup> Ammaa Israa'iilankoobe pilorake fonnditaare e jokkugol Tawreeta, de 6e kebaay fonnditaare ndeen. <sup>32</sup> Ko wadi? Sabo 6e piloraaki dum goondinal, wo e golle mabbe 6e pilorii dum. Ndelle 6e pergake e «hayre fergoore ndeen» <sup>33</sup> hono no Binndi diin mbiiri ni: «Inan, mi joyyinan e Siyona hayre nde yimbe per-gotoo e muudum, tefaare liboore dum'en.

De goondindo nde fuu semtintaake.»†

## 10

<sup>1</sup> Sakiraabe, ko muuyumi ley bernde am e ko nyaagotoomi Laamdo wo Israa'iilankoobe kisinee. <sup>2</sup> Mido seedanoo 6e 6e njinnganii Laamdo sanne, de jinngi diin ngaldaa e paamal. <sup>3</sup> Be paamaay fonnditaare nde Laamdo hokkata ndeen, faa 6e pilanii ko'e mabbe dabare laataade fonnditiibe. Duum wadi de 6e downtanaaki laawol ngol Laamdo ndaardata neddo wo ponnditiido ngool. <sup>4</sup> Sabo Almasiihu woni timmoode jamiroje Tawreeta faa goondindo dum fuu ndaardee ponnditiido.

*No kisindam woodirani goondindo Almasiihu fuu*

<sup>5</sup> Inan ko Muusaa winndi dow fonnditaare yuurunde e Tawreeta ndeen: «Neddo gadoowo

---

† 9:33 Esaaya 28.16.

jamirooje Tawreeta, kam wuurdatal saabe maa jje.»\* <sup>6</sup> Ammaa inan ko haala Laamdo wi'i dow fonnditaare yuurunde e goondinal ndeen: taa wi'u e bernde maa «Moy yeejata dow kammu?» Dum woni faa jippina Almasiihu, <sup>7</sup> naa «Moy yahata laakara?» Dum woni faa ummintina Almasiihu e hakkunde maaybe. <sup>8</sup> Ndelle, dume Binndi diin mbi'i? «Konngol Laamdo ina badii ma, ingol woni e hunnduko maa, ingol woni e bernde maa.»† Konngol ngool woni kabaaru goondinal ngal min mbaajotoo ngaal. <sup>9</sup> Si a wi'ii e hunnduko maa Iisaa wo Joomiraado, de a goondinii e bernde maa Laamdo iirtinii mo e maayde fu, a hisinte. <sup>10</sup> Sabo wo e bernde neddo goondinta, de Laamdo ndaar dan dum ponnditiido. Wo e hunnduko neddo haaldata ko goondini, de Laamdo hisina dum. <sup>11</sup> Wo hono Binndi diin mbiiri: «Goondindo mo fuu semtintaake.» <sup>12</sup> Joonin, walaa ko senndi Alhuudiyanke e mo wanaa Alhuudiyanke. Be fuu Joomii be wo gooto, kam woni kebbinoowo moyyereeji muudum e noddoobe dum been fuu. <sup>13</sup> Sabo «neddo fuu noddudo innde Joomiraado, hisinte.»‡

<sup>14</sup> Ammaa noy be kefirta noddude mo si be ngoondinaay mo? Noy be ngoondinirta mo si be nanaay kabaaru makko? Noy be nanirta kabaaru makko si baajotoodo walaa? <sup>15</sup> Noy yimbe mbaajortoo du si nulaaka? Binndi diin mbi'ii: «Ndaar, koyde jottinoje Kabaaru Lobbo na mbelna bernde koy!»§ <sup>16</sup> De wanaa yimbe

---

\* **10:5** Lewinkooobe 18.5. † **10:8** Fillitagol Tawreeta 30.12-14.

‡ **10:13** Jowiila 3.5. § **10:15** Esaaya 52.7.

fuu njabani Kabaaru Lobbo oon. Annabi Esaaya wi'ii: «Joomiraado, moy goondini waaju amin?»\*  
**17** Ndelle goondinal ina yuura e nanude waaju, waaju du ina yuura e konngol Almasiihu.

**18** De mido yama yalla Israa'iilankooße nanaay naa? Be nanii koy! Aayaare wi'ii:

«Daade maabbe nanaama e adunaaru fuu, konngi maabbe njottake faa hoore leydi.»†

**19** Mido yama katin: Israa'iilankooße paamaay naa? Gilla arande Muusaa winndii ko Laamdo wi'i:

«Mi wadan faa kiron yimbe 6e nganaa yuwdi goon-gaari,

mi wadan faa tikkanon yuwdi ndi walaa hakkillo.»‡

**20** Ndeen kaa, annabi Esaaya hulaay wi'ude caggal duum:

«Yimbe 6e pilaakino kam 6een njiitii kam, yimbe 6e yamanaay kam 6een du,

mi 6anganii dum'en hoore am.»§

**21** Ammaa to Israa'iila, Laamdo wi'ii:

«Fajiri faa futuro mido filoo jaabbaade yimbe saliibe, sattube.»\*

## 11

### *No Laamdo holliri ina yurmoo Israa'iilankooße*

**1** Ndelle, mido yama yalla Laamdo yoppii yimbe muudum Israa'iilankooße been naa? O yoppaay! Sabo miin e hoore am wo mi Israa'iilanke, wo mi yuwdi Ibrahiima, wo e lenyol Benyamin njeyaami.

---

\* **10:16** Esaaya 53.1.   † **10:18** Jabuura 19.5.   ‡ **10:19** Fillitagol Tawreeta 32.21.   § **10:20** Esaaya 65.1.   \* **10:21** Esaaya 65.2.

<sup>2</sup> Laamdo yoppaay yimbe muudum be subinoo gilla arande been. Yalla on anndaa ko Binndi diin mbi'i nde annabi Iliyaasa woyanannoo Israa'ilankooobe been to Laamdo naa? O wi'ii: <sup>3</sup> «Joomiraado, be mbarii annabaabe maa, be kalkii kirsirde maa sadaka. Miin tan heddi, de ibe ndaara no be mbarda kam.» <sup>4</sup> Ammaa dume Laamdo jaabii mo? O wi'ii: «Mi resanii hoore am worbe ujunaaje njeddo be cujidanaay tooru wi'eteendu Ba'al.» <sup>5</sup> Hono noon, hakkunde yimbe hannden been, ina woodi yimbe seeda be Laamdo suborii saabe hinney muudum. <sup>6</sup> De si o suborake be hinney fu, en anndan o suboraaki be saabe golle maabbe. Si wo saabe golle maabbe fu, hinney Laamdo oon heddataako laataade hinney katin.

<sup>7</sup> Ndelle, dume laatii? Ko laatii dey, Israa'ilankooobe been kebaay ko pilotonoo duum, wo be Laamdo subii been ni kebi dum. Heddiibe been, berde mubben njoornaa <sup>8</sup> hono no winndiraa ni:

«Laamdo uddii hakkillooji maabbe,  
wumnii gite maabbe, faadiniit noppo maabbe.

Faa hannden noon worri.»\*

<sup>9</sup> Daawda du wi'ii:

«Wo rewugol maabbe bonngol ngool laatanoo be tuugol† faa be njana ley maggol,  
laatanoo be fergere faa be njukkee.

<sup>10</sup> Wo gite maabbe nibbinee taa be nji'a,  
wo faaawe maabbe turee faa abada!»‡

<sup>11</sup> Ndelle, mido yama: ko Alhuudiyankooobe been pergii duum, yalla wo faa be caama faa abada naa?

---

\* **11:8** Fillitagol Tawreeta 29.3, Esaaya 29.10. † **11:9** Tuugolwo ko wo66e mbi'ata huuseeru maa bedorgal. ‡ **11:10** Jabuura 69.23-24.

Wanaa koy! De wo saabe lutti maabbe diin, yimbe be nganaa Alhuudiyankoobe been kebiri kisindam, faa Alhuudiyankoobe been kira. <sup>12</sup> Si lutti maabbe diin laatanake yimbe adunaaru barke, si mursey maabbe du laatanake be nganaa Alhuudiyankoobe been barke, barke oon furan dum manngu sanne si Alhuudiyankoobe been fuu tuubii.

*Haala hisineede yimbe be nganaa Alhuudiyankoobe*

<sup>13</sup> Joonin, wo onon yimbe be nganaa Alhuudiyankoobe been kaaldammi: ko laatiimi nulaado e moodon duum, mido mantoroo gollal ngal kokkaami ngaal <sup>14</sup> de na hasii mi heban waddude kiram e ley lenyol am, faa mi hisina wobbe maabbe. <sup>15</sup> Sabo si woddineede Alhuudiyankoobe wadi de yimbe adunaaru ndewrintinaa e Laamdo fu, dume laatoytoo si be njabbowaama? Dum laatorto hono wo be yaltube e maayde!

<sup>16</sup> Si tamre arandeere sakkaama Laamdo, tame kettiide deen du cakkaama. Si dadì lekki cakkaama Laamdo, licce deen du cakkaama. <sup>17</sup> Joonin le, Israa'iilankoobe ina nga'i hono no lekki jaytun ki licce muudsum godde caltaa. Aan mo wanaa Alhuudiyanke nanndudo e liccal jaytun laddeehi, a waddaama, a dobaama e jaytun kiin. Nii kebirdaa ngedu e ko yuurata e dadì jaytun kiin. Ada heba barke lekki kiin, ada mawnida e licce godde deen. <sup>18</sup> Saabe majjum, taa mantodaa yeeso licce caltaade deen. De si ada mantoo fu, miccodaa wanaa aan wuurni dadì diin, wo dadì diin mbuurni ma. <sup>19</sup> Ina woodi tawee ada wi'a: «Ko wadi de licce deen caltaa dey, wo faa miin mi naata, mi dobbee do.» <sup>20</sup> Goonga! Ammaa ko de

caltiraa dey, wo rafi goondinal majje. Aan ada heddii e dobeede saabe goondinal maa. Ndelle, taa mawninkina, ammaa hulu. <sup>21</sup> Sabo si Laamdo accaay licce arandeeje seen fu, accataa ma aan du. <sup>22</sup> Ndelle, taykita moyyuki Laamdo e tikkere muudum fuu: tikkere makko na woni e saamuþe been, de moyyuki makko na woni e maada sini ada tabiti e moyyuki kiin. Si wanaa ðuum fu, aan du a saltete. <sup>23</sup> Israa'iilankoobe du, si þe njoppii salaare maþþe de þe ngoondini fu, Laamdo nannan þe katin hono no licce ndobirtee e lekki. Sabo Laamdo ina jogii baawðe dobude þe e lekki kiin katin. <sup>24</sup> Ndelle aan yuurudo e lekki laddeehi oon, si a saltaama e makki a dobaama e lekki jaytun aawaaki kiin, haala fuu walaa licce yuurde e lekki aawaaki kiin, si caltanooma ina mbaawi dobeede e inna muþben.

### *No Laamdo yurmortoo yimþe fuu*

<sup>25</sup> Sakiraabé, mi yidaa ndullon ko suudi dum do, heþa taa ndaardon ko'e mon wo on jom'en hakkillo: Israa'iilankoobe laatake yoorþe berde, de ðum timman wakkati siyiji yimþe þe nganaa Alhuudiyankoobe fuu ngoondini, naati laamu Laamdo. <sup>26</sup> Hono noon Israa'iilankoobe been fuu kisinirtee, no Binndi diin mbiiri ni:

«Kisinoowo yuuran e Siyona,  
ittan luttal fuu e yuwdi Yaakuuba.»§

<sup>27</sup> «Dum woni amaana am e maþþe  
wakkati nde mooytammi hakkeeji maþþe.»\*

---

§ **11:26** Esaaya 59.20. \* **11:27** Yeremiya 31.33-34.

**28** Ko Alhuudiyankoobe been njabaay Kabaaru Lobbo oon duum, be laatorii waybe Laamdo, ammaa wo dum saabe moodon faa kebon Kabaaru oon. De ko Laamdo subii be dum, be laatake be o yidi saabe maamiraabe mabbe. **29** Wo noon, sabo Laamdo waylitataa anniya dow mo moyyinani dokke muudum, e dow mo noddi. **30** Onon yimbe be nganaa Alhuudiyankoobe, arande on calakeno Laamdo, de joonin kaa on kebii yurmeende saabe sattere Alhuudiyankoobe. **31** Noon du, joonin wo been calii Laamdo, de Laamdo yurmii on. De dum laatake faa been du keba yurmeende makko. **32** Sabo Laamdo uddii yimbe fuu e ley salaare, faa o yurmoo be fuu.

**33** Hey barkeeji Laamdo korsudi ina keewi! Hakkilantaaku makko e anndal makko ina luggi! Fay gooto waawaa anndude anniyaaji makko. Fay gooto waawaa faamude laabi no o gollirta. **34** Wo hono noon winndiraa:

«Moy anndi miilooji Joomiraado?

Moy latii tindinoowo dum?»†

**35** «Moy artii hokkude mo sakko o yoba dum?»‡

**36** Si goonga, huunde fuu e makko yuuri, huunde fuu wo kanko tiigii, huunde fuu wo kanko jeyi. Wo teddeengal woodan mo faa abada! Aamiina.

## 12

### *No goondinbe Isaa kaani wuurdude*

**1** Ndelle sakiraabe, mido nyaagoo on sanne saabe yurmeende Laamdo, cakkee ko'e mon laatodon sadaka buurdo, ceniido, beldo Laamdo.

---

† **11:34** Esaaya 40.13. ‡ **11:35** Ayuuba 41.3.

Dum woni dewal ngal kaandon rewrude mo ngaal. <sup>2</sup> Taa nyemmbitee adunaaru, ammaa accee Laamdo heydintina hakkillooji mon faa berde moodon mbaylitoo. Ndeen, on mbaawan anndude muuyde Laamdo: ko woodi e ko weli mo e ko hiibbi.

<sup>3</sup> Saabe moyyere nde Laamdo hokki kam ndeen, mido wi'a mono e moodon fuu: taa njaaree ko'e moodon to on njottaaki, ammaa ndaardon ko'e mon e miilooji hakkilantaaku, kawrooji e goondinal ngal Laamdo etani on ngaal. <sup>4</sup> Gooto e meeden fuu ina jogii terde keewde, de terde deen fuu kawtaa golle. <sup>5</sup> Hono noon, enen e keewal meeden fuu, wo en neddo gooto e ley kawtal meeden e Almasiihu. En fuu eden njeydaa no terde fuu njeydiraa e banndu ni.

<sup>6</sup> En kokkaama dokke ceedude de Laamdo hokkiri en moyyere muudum. Si Laamdo hokkii neddo haaltude konngol ngol watti e muudum, haaltira ngol no fotiri e goondinal muudum. <sup>7</sup> Mo Laamdo hokki dokkal wallude wobbe, o walla be. Mo o hokki dokkal jannginde, o janngina. <sup>8</sup> Mo o hokki dokkal semmbindina yimbe, o semmbindina dum'en. Mo o hokki dokkal moyyande wobbe du, o hokkira e yardaamuye. Mo o hokki dokkal ardaade, o ardoroo tinnaare. Mo o hokki dokkal yurmeende du, o yurmoro wobbe e seyo.

<sup>9</sup> Njinngu moodon laatoo ngu waldaa e naafikaaku. Mbanyee ko boni, kabbee e ko woodi. <sup>10</sup> Njidunduree njinngu sakiraagu, mono fuu teddina banndum faa burna dum hoore muudum. <sup>11</sup> Taa accee tinnitaare mon feewa. Ngollanon Joomiraado e berde mon fuu.

**12** Mbeltee e ley jikke moodon, munyee torra, tinnee keddododon e du'aare. **13** Mballee seniibe Laamdo e haajuuji muubbén, laatee jaabotoobe weerbe. **14** Mbarkinee torroobe on. Mbarkinon be, taa kudon be. **15** Ceyodee e seyiibe, mboydee e woyooße. **16** Laatodee miilo wooto. Taa pilee manngu ammaa kawtee ko'e mon e lokkaabe. Taa tiigoree ko'e mon on jom'en hakkillo. **17** Si goddo wadii on ko boni, taa njomnitee dum. Kakkilanee wadude ko yimbe fuu ndaarata na ñardi. **18** Si na laatoo, ngondiree e yimbe fuu e jam. Pilodon dum haddi no mbaawrudon. **19** Sakiraabe horsube, taa njomnitanee ko'e mon. Ko kaandon wadude dey, accee tikkere Laamdo ndeen yomnitanoo on. Sabo e ley Binndi diin Joomiraado wi'ii: «Miin woni jomnitotoodo, miin yoboyta be.»\* **20** Ina winndaa katin: «Si ganyo ma yolbii fu, nyaamnaa dum, si domdii njarnaa dum. Si a wadii nii fu, a wadan o semta saabe ko o wadi ko boni duum.»† **21** Taa accu ko boni jaale, ammaa jaalora ko boni duum e ko woodi.

## 13

### *Haala downtanaade laamiibe*

**1** Mono fuu dowtanoo laamiibe, sabo laamu walaa si wanaa yuurungu to Laamdo. Laamiibe fuu wo Laamdo joyyini dum'en. **2** Saabe duum, neddo fuu caliido laamu leydi salake ko Laamdo yamiri. Caliido yamiroore Laamdo du foodanan hoore muudum jukkungo. **3** Gadoowo ko woodi walaa ko huldata hooreebe been, wo gadoowo

---

\* **12:19** Fillitagol Tawreeta 32.35. † **12:20** Banndi 25.21-22.

ko boni hulata 6e. Ada yidi tawee a hulataa laamiibe leydi naa? Ndelle, ngadaa ko woodi. Ndeen laamu yettete. <sup>4</sup> Sabo laamiibe wo gollanoobe Laamdo faa nafe. Ammaa si tawii wo ko boni ngadataa, kulaa, sabo wanaa bolum laamiibe mbakkorii kaafaahi. Wo 6e gollanoobe Laamdo faa 6e tabintina jukkungo muudum dow gadoowo ko boni fuu. <sup>5</sup> Ndelle, tilay dawtanodon laamiibe been, wanaa saabe hulde jukkeede tan, ammaa faa taa berde mon pela on du. <sup>6</sup> Dum wadi de odon njoba lampo, sabo laamiibe been wo gollanoobe Laamdo, hokkube wakkatiji muusben fuu faa laamoo. <sup>7</sup> Kokkee mono fuu ko jeyi hokkeede. Kokkee lampo mo kaandon hokkude lampo, kokkon tino mo kaandon hokkude tino. Kulon mo kaandon hulude, teddinon mo kaandon teddinde.

### *No yimbe njeyri yidundurde*

<sup>8</sup> Taa njoganee fay gooto nyamaande. Huunde wootere tan haani laataade nyamaande, dum woni yidundurde. Sabo jiddo gondo muudum fuu, tabintinii jamirooje Tawreeta. <sup>9</sup> Odon anndi kadaadi dii do: «Taa jeenu, taa wadu warhoore, taa wuju, taa muuyu ko a jeyaa». Kanji e jamirooje godde deen fuu ina kawriti e yamiroore wootere. Ndeen woni: «Njidiraa gondo maa no njidiraa hoore maa ni.» <sup>10</sup> Jiddo gondo muudum wadataa dum ko boni. Ndelle njinngu na tabintina Tawreeta oon.

<sup>11</sup> Taykee kujje deen, sabo odon anndi wakkati mo ngonden e muudum. Wakkati mo kaandon finude oon yonii. Sabo joonin kisindam buri badaade en diina nde naatunoden e goondinal

ndeen. <sup>12</sup> Jemma 6adake timmude, nyalooma 6attake. Ndelle, celēn gollude golle nimre, kooyen kabitrde annoora. <sup>13</sup> Mbuurden no haaniri, hono no wonbe ley annoora nyalooma. Wanaa e ley fijirde bonnde e sulagol, wanaa e golleeji balli tuundi e rafi semto, wanaa e poodundural e kiram. <sup>14</sup> Bornoree Joomiraado meeden Iisaa Almasiihu hono no kaddungal ni, taa kilnee muuyde terde moodon, taa nyaamnon de.

## 14

### *Haala lokkaabe e jom'en semmbe*

<sup>1</sup> Njaabbee mo goondinal muudum lokkidi tawa on peldaay dum ko miilotoo. <sup>2</sup> Hasii goddo ina woodi goondinal faa na waawi nyaamude huunde fuu, tawee goddo du goondinal muudum ina lokkidi faa nyaamataa teewu. <sup>3</sup> Nyaamoowo teewu oon taa yawa mo nyaamataa feewu oon. Mo nyaamataa teewu oon taa fela nyaamoowo teewu oon, sabo Laamdo jaabake mo. <sup>4</sup> Aan, wo a moy faa pelaa gollanoowo goddo? Yalla imo darii faa woodi naa o saamii, dum fuu wo donngal joomiiko. O daroto faa wooda du, sabo Joomiraado ina woodi baawde jogaade mo faa o daroo.

<sup>5</sup> Hasii goddo ina jogorii nyalaande wootere ina buri godde teddude, tawee goddo du ina jogorii nyalaade fuu wo potu. Mono fuu tannyora ko miilotoo dum e ley hakkillo muudum. <sup>6</sup> Burdindo nyalaande oon wadirii dum saabe Joomiraado. Katin du, nyaamoowo ko yidi fuu oon wadirii dum saabe Joomiraado, sabo imo yetta Laamdo. Mo nyaamataa teewu oon du wadirii

dum saabe Joomiraado, imo yetta Laamdo kanko du. <sup>7</sup> Sabo fay gooto e meeden wuulantaa hoore muudum, katin du fay gooto e meeden maayantaa hoore muudum. <sup>8</sup> Si en mbuurii, wo Joomiraado mbuuranden. Si en maayii du, wo Joomiraado maayanden. Si en mbuurii naa si en maayii fu, wo Joomiraado oon jeyi en. <sup>9</sup> Sabo Almasiihu maayii, de ummii e maayde faa laatoo Joomiraado wuurbē e maaybē fuu.

<sup>10</sup> Aan, ko wadi de ada fela sakiike maa goondindo oon? Naa aan, ko wadi de ada yawa sakiike maa goondindo oon? En fuu, en ndaroyto yeeso sarorde Laamdo. <sup>11</sup> Sabo ina winndaa:

«Joomiraado wi'ii:

«Tannyoree, no tannyordon mi buurđo:

Koppi fuu kofanto kam,

demle fuu ceedoto miin woni Laamđo.» \*

<sup>12</sup> Ndeen mono e meeden fuu jaabanto hoore muudum yeeso Laamdo.

<sup>13</sup> Dum le, taa pelunduren hakkunde meeden katin. Kooyee anniya reentaade e huunde fuu ko waawi fergude sakiike mon naa ko libata dum.

<sup>14</sup> Saabe kawtal am e Joomiraado men lisaas mido tannyori nyaamdu fuu e hoore muudum harmaa. Ammaa si neddo miilii godsum wo karmudum, dum harmanan dum kam kaa. <sup>15</sup> Si a torrii sakiike maa goondindo oon saabe ko nyaamudaa, a jokkaay laawol njinngu. Taa halku mo Almasiihu maayani dow ko nyaametee. <sup>16</sup> Ndelle, ko ndaardon na woodi duum, tinnee taa wobbe mbonkoo on saabe majjum. <sup>17</sup> Sabo laamu Laamdo wanaa kabaaru nyaamdu naa njaram,

---

\* **14:11** Esaaya 45.23.

wo kabaaru fonnditaare e jam e seyo ley kawtal Ruuhu Ceniido. <sup>18</sup> Golliranoowo Almasiihu hono noon fuu, welan Laamdo, yimbe du teddinan dum. <sup>19</sup> Ndelle, piloden ko beydata jam hakkunde meeden. Mono fuu filoo ko semmbindinta bandum ley goondinal.

<sup>20</sup> Taa mbonnon golle Laamdo saabe haala nyaamdu. Si goonga, nyaamdu fuu ina laabi, ammaa si nyaamdu ndu nyaamataa nduun ina ferga sakiike maa, nyaamude ndu woodaa. <sup>21</sup> Ko woodi dey, wo taa nyaamon teewu naa njaron doro, naa ngadon huunde fuu ko fergata sakiike moodon. <sup>22</sup> Huunde fuu ko ngoondindaa, njogodaa dum hakkunde maa e Laamdo. Barke woodanii mo sikkirtaa ko woni e hakkillo muudum. <sup>23</sup> Ammaa si neddo wadii sikki-sakka de nyaami fu, jukkete, sabo joomum nyaamiraay goondinal. Huunde fuu ko waldaa e goondinal wo luttal.

## 15

<sup>1</sup> Enen sellube goondinal been, eden kaani wallude be goondinal mubben lokkidi been. Haanaa ngaden ko weli en tan. <sup>2</sup> Gooto e meeden fuu filoo ko welata gondo muudum, faa nafa dum, de semmbindina dum ley goondinal. <sup>3</sup> Sabo fay Almasiihu jokkaay mbelirka yonki muudum, ammaa laatake no winndiraa ni: «Mbonkaaji mbonkiibe ma diin e am njani.»\* <sup>4</sup> Ko winndanoo arande e ley Biindi diin diuum, winndaama faa janngina en. Idi kolla en munyal, idi cellina berde men, faa keben tannyoral ley jikke men. <sup>5</sup> Laamdo jom munyal, cellinoowo berde oon, hokku on

---

\* <sup>15:3</sup> Jabuura 69.10.

laataade jom'en miilo wooto hono no Iisaa Almasi-  
ihu anndiniri on ni. <sup>6</sup> Noon teddinariton Laamdo e  
anniya gooto e daande wootere. Oon woni Baaba  
Iisaa Almasiihu Joomiraado men.

<sup>7</sup> Njabbunduree no Almasiihu jaabborii on ni, faa  
Laamdo teddinee. <sup>8</sup> Mido wi'a on: Almasiihu  
warii gollani Alhuudiyankoobe. Ko o gollani be  
duum hollitii Laamdo wo koolniido, sabo tabin-  
tinii amaanaaji di wadannoo maamiraabe maabbe  
diin. <sup>9</sup> Woodi du, wo faa lenyi goddi diin teddina  
Laamdo dow yurmeende muudum, hono no win-  
ndiraa:

«Saabe duum, mi yettete hakkunde lenyi,  
mi yimante faa teddina innde maa.»†

<sup>10</sup> Ina winndaa katin:  
«Onon lenyi, mbeltodee e yimbe Joomiraado  
been.»‡

<sup>11</sup> Katin du:  
«Njettee Joomiraado, onon lenyi fuu!

Manee mo, onon siyiji yimbe fuu!»§

<sup>12</sup> Annabi Esaaya du wi'ii:

«yūurudo e lenyol Yesa warowan,  
oon ummoytoo faa laamoo lenyi adunaaru.

Di njowan jikke majji e makko.»\*

<sup>13</sup> Laamdo jom jikke oon hebbin on seyo e jam  
fuu saabe ko ngoondindon mo, faa jikke moodon  
beydoo heewude saabe baawde Ruuhu Ceniido!

### *No Pool haaldi kabaaru golle muudum*

<sup>14</sup> Sakiraabe am, mido tannyori odon keewi  
mboodirka, odon keewi anndal, katin du mono

---

† **15:9** 2 Samuwiila 22.50, Jabuura 18.50.   ‡ **15:10** Fillitagol  
Tawreeta 32.43.   § **15:11** Jabuura 117.1.   \* **15:12** Esaaya 11.10.

fuu na waawi tindinde banndum. <sup>15</sup> Ammaa ley 6ataaki ki mido suusi haalande on haalaaji goddi faa laaba faa mi miccintina on di. Mi haaldirii noon saabe moyyere nde Laamdo hokki kam <sup>16</sup> laataade gollanoowo Iisaa Almasiihu e ley yimbe 6e nganaa Alhuudiyankooбе. Ko mbaajotoomi Kabaaru Lobbo oon duum wo gollal ceningal faa 6e nganaa Alhuudiyankooбе been laatoo sadaka beldo Laamdo mo Ruuhu Ceniido senini. <sup>17</sup> Ndelle, e kawtal am e Iisaa Almasiihu, mido waawi mantoraade golleeji di ngollanmi Laamdo diin. <sup>18</sup> Sabo walaa fuu ko cuusumi haalude si wanaa ko baawde Almasiihu tabintini e ley golle am faa waddana 6e nganaa Alhuudiyankooбе been dowtanaade Laamdo. O wadii dum ley haala am e ley golle am, <sup>19</sup> e ley baawde maandeeji e kaayeefiji, fuu dow baawde Ruuhu Laamdo. Hono noon njottinirmi Kabaaru Lobbo haala Almasiihu oon nokkuuje fuu gilla Urusaliima e seraaji muudum faa leydi Illiriya. <sup>20</sup> Katin du, gilla arande anniya am wo waajaade Kabaaru Lobbo do innde Almasiihu yottaakino, faa taa mi nyiba dow nyimngo neddo goddo. <sup>21</sup> De mi wada hono no winndiraa ni:

«Be kumpitaakano haala makko been nji'owan,  
 6e nanaayno been du paamowan.»†

### *Haala anniyaaji Pool*

<sup>22</sup> Wo gollal waajaade ngaal hadi kam warude to moodon kile keewde. <sup>23</sup> Joonin kaa, gollal ngaal huubii leyde dee do. Katin du wadii duubi keewdi ko njidumi warude to moodon. <sup>24</sup> Mido

---

† 15:21 Esaaya 52.15.

yidi fantude to moodon si mido yaha Espanya. Si mi ndaarii on de ceyodiimi e moodon fu, odon mbaawi wallude kam e jahaangal am faa mi yot-towoo toon.

<sup>25</sup> De joonin kaa mi yahan Urusaliima faa mi walla seniibe wonbe toon. <sup>26</sup> Sabo kawrite goondinbe gonde Makedoniya e Akaya deen anniyake hawrundurde mballa faa kokka talkaabé jeyaabe e seniibe Urusaliima been. <sup>27</sup> Be anniyorii dum berde belde, de na tilsani be hono njobdi du. Sabo si Alhuudiyankoobe been mballii lenyi goddi diin keba ngedu e barkeeji Ruuhu fu, lenyi diin du ina kaani wallirde Alhuudiyankoobe e kijje adunaaru. <sup>28</sup> Si mi yottinii dum, mi hokkii be ko hawrunduraa duum fu, mi yahan Espanya, mi fantan to moodon. <sup>29</sup> Mido anndi si mi warii to moodon fu, mi wardan e barke Almasiihu keewdo.

<sup>30</sup> Sakiraabe, saabe Joomiraado meeden Iisaa Almasiihu e saabe njinngu ngu Ruuhu oon hokkata nguun, mido nyaagoo on sanne: kawton e am e ley du'aawuuji moodon to Laamdo saabe am. <sup>31</sup> Naarodon Laamdo danna kam e yimbe be ngoondinaay wonbe Yahuudiya been, katin du seniibe wonbe Urusaliima been njaaboo ballal ngal njaaranammi dum'en ngaal. <sup>32</sup> Hono noon, mi yottorto on e bernde welnde saabe muuyde Laamdo, de keedden powtiri seeda. <sup>33</sup> Laamdo jom jam wondu e moodon, on fuu. Aamiina.

## 16

### *Jowtaali*

<sup>1</sup> Mido haalana on kabaaru sakiike meeden debbo bi'eteedo Febe, gollanoowo kawrital

goondinþe gonngal ley Kankiriya oon.  
<sup>2</sup> Njabborodon mo ley innde Joomiraado no seniibe been kaaniri njabborereede ni. Katin du mballee mo e huunde fuu ko o haajaa, sabo o wallii heewþe, miin du o wallii kam.  
<sup>3</sup> Njowtanon kam Pirisilla e Akila, gollidoobe e am golle Iisaa Almasiihu been. <sup>4</sup> Kamþe nesi mursude yonkiji maþþe faa þe ndanna yonki am. Wanaa miin tan yettata þe, kawrite goondinþe þe nganaa Alhuudiyankoobe deen fuu ina njetta þe.  
<sup>5</sup> Njowtanon kam goondinþe hawroobe ley suudu maþþe been fuu. Njowton Epaynetus, gido am korsudo oon. Kanko artii goondinde Almasiihu ley leydi Aasiya fuu. <sup>6</sup> Njowton Mariyama tampando on sanne oon. <sup>7</sup> Njowton Andoronika e Yuniya, banndiraabe þe uddidanoomi e kasu been. Wo þe nulaabe anndaabe sanne, katin du kamþe artii kam goondinde Almasiihu.

<sup>8</sup> Njowton Ampiliyaatu mo korsinirmi saabe Joomiraado oon. <sup>9</sup> Njowton Urbaanu, gollidoowo e meeden golle Almasiihu oon, kam e Estaaki gido am korsudo oon. <sup>10</sup> Njowton Apeles, tabintinaado wo jokkudo Almasiihu e goonga. Njowton yimþe galle Aristobul. <sup>11</sup> Njowton Herodiyon banndam oon. Njowton yimþe galle Narsisi hawtube e Joomiraado been. <sup>12</sup> Njowton Tirifena e Tirifosa, rewþe gollanoobe Joomiraado been. Njowton Persis mo korsinmi, oon wo debbo tampudo sanne e ley gollande Joomiraado. <sup>13</sup> Njowton Rufus mo Joomiraado subii oon. Njowton inniiko mo ndaardumi wo inna am ni, miin du. <sup>14</sup> Njowton Asinkiriti e Felegon e Hermes e Patorooba e Hermasa e goondinþe Iisaa wondube e maþþe been.

**15** Njowton Filoloogu e Yuliya, njowton Nere e sakiikem debbo, kam e Olimpa. Njowton seniibe wondube e mabbe been fuu. **16** Jowtunduron e jowtaali ceniidi. Kawrite goondinbe Almasiihu fuu ina njowta on.

**17** Sakiraabe, mido ɻaaroo on sanne, kakkilon e waddoobe ceedaagu. Ibe perga yimbe sabo be calake jannde nde kebudon ndeen. Mboddee be! **18** Sabo yimbe wa'ube hono noon ngollantaa Joomiraado meeden Almasiihu. Ko be ngollanta dey, wo deedi mabbe. Wo e haalaaji mabbe beldi e manooje mabbe jaayde be majjinirta hakkillooji yimbe be anndaa been. **19** Onon le, kabaaru dowtaare moodon yottake yimbe fuu. Saabe duum mido weltoroo on, de mido muuyani on laatodon jom'en hakkillo e dow ko woodi, laatodon be ngalaa feloore du e dow ko boni. **20** Laamdo jom jam oon wadan niison Seydaani ley teppe moodon ko ɻooyataa. Hinney Joomiraado meeden Iisaa wondu e moodon.

**21** Timote gollidoowo e am oon ina jowta on. Lukiyus e Yason e Sosipatoro banndiraabe am been ina njowta on. **22** Miin, Tertiyu, binndando Pool ɻataaki ki oon, mido jowta on saabe kawtal meeden e Joomiraado. **23** Gayus, beero am mo kawrital goondinbe ngaal hawrata galle muudum oon, ina jowta on. Erasta kalfinaado kaalisi ngalluure nde oon ina jowta on, kam e Kuwartus sakiike meeden oon. [ **24\*** ]

### *Jettooje*

---

\* **16:24** E dereeji ɻooydi, goddi ina ɓeyda aaya 24: Hinney Joomiraado meeden Iisaa Almasiihu wondu e moodon on fuu. Aamiina.

25 Jettooje ngoodanii Laamđo baawđo semmbinde on fodde Kabaaru Lobbo haala Iisaa Almasiihu mo mbaajiimi oon. Kabaaru Lobbo oon wo 6angugol sirri Laamđo cuudanoodo gilla arande <sup>26</sup> de joonin o 6anginaama. Dewte annabaabe anndinii dum lenyi diin fuu no Laamđo duumiido oon yamiri ni, faa di ngoondina Laamđo, di dōwtanoo dum. <sup>27</sup> Laamđo kam tan woni hakkilanteejo. Teddeengal woodan mo faa abada saabe Iisaa Almasiihu. Aamiina.

## **Fulfulfe Burkina, Dewtere Laamdo Amaana Keso**

### **Fulfulde Burkina New Testament**

copyright © 2012 SIM International

Language: Fulfulde Burkina (Fulfulde, Western Niger)

Dialect: Burkina

Translation by: SIM International

## **Fulfulfe Burkina, Dewtere Laamdo Amaana Keso**

This translation, published by SIM International, was published in 2012. If you are interested in obtaining a printed copy, please contact the SIM (Mission Protestante), BP 1552, Ouagadougou 01, BURKINA FASO.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

    You must give Attribution to the work.

    You do not sell this work for a profit.

    You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
c32b76d2-ab0d-5ad5-a698-b4140754fcc2